

滇文丛录

卷四十九
至五十二

滇文叢錄卷四十九

雲南叢書集部之八十八

陳議類四

總陳水患情形疏

程含章

竊臣奉命署理工部左侍郎辦理直隸水利事務隨于交卸江西巡撫篆後沿途採訪博稽舊案得有端倪此番行入直境歷過景州阜城交河獻縣河間任邱雄縣新城涿州良鄉十州縣沿途履勘河淀訪問官紳士民又得各道府稟呈畧節通省之利弊情形雖未周歷履勘業已得其大概知直隸之水患已深不可不急急圖之也查直隸枕山近海平原千里本禹貢冀州之域枕山則雨水陡瀉挾沙帶泥近海則衆水朝宗地形窪下平原廣野則河水停積消洩不速故其受水患也獨深當堯舜時洪水爲災大禹治之亦於冀州工力爲多以國朝之近事言之雍正三年頻次大水欽差怡賢親王與大學士朱軾治之大興水利用銀數百萬兩歷五年而竣事乾隆四十年又復大水直隸總督孫嘉淦治之歷兩年而竣事乾隆九年又復大水欽差尙書劉於義會同督臣高斌治之歷四年而竣事乾隆十六年直隸總督方觀承大修天津尾閘一次二十六七年又復大水方觀承治之歷三年而竣事以上四次

共用銀數百萬兩自此之後水道通利者數十年迨嘉慶六年大水後大小河道無不淤淺其時因川陝軍務未平未暇修治嗣後愈加淤積以致道光二三年大雨滂沱被水州縣多至一百餘處小民蕩析離居哀鴻遍野幸蒙聖主如天之仁每歲賑恤銀米百數十萬百姓不致困斃然以數百萬嗷嗷待哺之民咸仰給於官豈可爲常則疏通河淀誠目前至急至要之務無可再緩矣臣聞治水如治病然治病者必先明乎病之源流統全體而熟查之按部位而諦審之急則治其標緩則治其本以通省之大勢觀之天津爲衆水出海之路若海河若塘河淀若七里海若賈家沽若陳家溝若三岔河若興濟若捷地若鉤盤若老黃河若筐兒港若王家務各減河皆所以洩水入海猶人之有尾閭也東河廻環數百里全省之水皆停蓄于此若楊家河若楊芬港若台頭若勝芳若辛張河若三汶皆淀中之河道沉沍汪濊猶人之有腹囊也大清子牙永定南運北運五大川乃衆水之大宗流貫淀中猶之有腸臟也西淀容納順天保定河間三府二十餘河之水南北二泊容納正定順德廣平三府二十餘河之水猶人之有胃垣也而其傳送之區若大港若馬道若清河門若張青口若玉帶中亭若廬僧等河猶人之有胸膈也其上若豬龍若九龍府河若三岔口

若新河若十字河若新澧河若滄河吐納各支河之水流注淀泊猶人之有咽喉也各屬之支港溝渠引導積水入河猶人之有血脉也今則消洩之尾閘無不阻塞停蓄之腹囊無不淺隘流貫之腸臟無不平壅滯收納之胃垣無不平淺傳送之胸膈無不淤積吐納之咽喉無不填闕流通之血脉無不凝滯加以各河淀之大小隄埝閘填橋梁無不淺缺每遇霖潦大至有不泛濫淫溢者乎此直隸水道受病之部位情形也伏思自有直隸以來即有此河渠淀泊前乎此者不聞頻患水災自康熙三十九年以後常苦水撈則永定子牙二濁河築隄之所致也昔孫嘉淦有言永定子牙向皆無隄泥得流行田間而水不淤淀自永定築隄東水而勝芳三角等淀皆淤自子牙築隄東水面台頭等淀亦淤淀口既淤河身日高於是乎田水入河之路阻陳儀亦云永定自古無隄雖有遷徙冲齧之虞而填淤肥美秋禾所失夏麥倍償原不足爲害自築隄東水東流入淀於是淀病而全局皆病即永定一河亦自不勝其病總因濁水入淀沙散泥沉之故又直隸水道致病之根源也伏查永定河自築隄以來於今已百有餘年河身高出平地丈有餘尺既不能挑之使平又不能廢隄不用雖明知病根而無法可治亦惟見病治病多開閘填以分其勢高築隄埝以禦其

衝使不潰決爲害而已至通省大局工段繁多自不能同時並舉惟有用治標之法
先將河淀之尾閘胸膈咽喉一律挑挖寬深挑出之土用以築堤使窪水得以暢然
下注然後廓清腹臟利通腸胃俟大端就理然後用治本之法調理血脉將各州縣
之支港溝渠逐一疏通俾民間灌溉有資旱潦有備三五年後元氣漸復此又現在
辦理之先後次第也至承辦工段領支錢糧必須分段責成各道府各率所屬之州
縣佐雜並紳士農民各治所屬之水一則責無旁貸二則情形較熟三則呼應較靈
四則利害切身較之委員承辦者費省而工倍此番工程浩大除永定河例係官修
並大川大泊大淀大隄及木石一切料物非民力所能辦理者照例估計外其餘挑
河築隄旣難概照土方致滋多費而百姓連年災歉又不能枵腹從事惟照以工代
賑之例爲得事理之平臣於途次接閱督臣蔣攸銘來咨業經疊次具奏皆已悉協
機宜惟湏嚴立賞罰明定章程然後人心齊奮辦理妥速也抑臣更有請者臣聞治
病者固在醫方之良尤貴藥力之足若有方無藥雖扁鵲盧醫不能徒手而奏效經
費者治水之藥物也此番工程之大十倍於乾隆年間以彼時疊次大修之後河淀
之淤塞猶輕此番當數十年未修之餘河淀之淤塞更重也臣極知堤在庫貯未盈

理宜處處節省然天下事有名爲省至實費者有名爲費而實省者所當合朝野上下前後而熟計之自道光元年以來皇上之加恩於直隸災民者賑卹蠲緩不下六七百萬而百餘州縣民間兩年不收之糧食不下七八千萬水浸之房屋損壞之器物又不七千餘萬合公私耗損之財用計之當不下十千餘萬曩令早用二三百萬以治河則可節省六七百萬之蠲賑藏之公府並可保全十千餘萬之食貨藏之民間則上下公私交受其益也倘再不速用數百萬以治河竊恐每年仍須蠲賑銀米二三百萬而河道終須修治仍須用銀數百萬民間每年不收之糧食又不下三四千萬無論公項不支而畿輔數百萬生靈將不可復問則上下公私交受其困也且挑河築隄必須一氣呵成修一段即完善一段方爲有益若輕挑小築工作未完一遇大雨時行勢必至挑者復淤築者復圯爲費轉鉅臣愚昧之見以其緩辦而費多不若速辦而費少與其零辦而費重不若全辦而費輕此案工費斷非一二百萬所能竣事若每歲只用銀數十萬何年得了臣查沿途地方情形皆屬安靜惟鳩形鵠面向臣呼籲求救者不少現在市集糧價每麵一斤制錢四十餘文小米一升制錢五十餘文縱有倉谷平糴於事何濟必須地中出穀乃得糧價平減而河水一日不

治則莊稼一日不收莊稼一日不收則民間一日無食民間一日無食則聖心一日不安臣反覆思維惟有仰懇聖恩飭部通盤籌議寬給經費俾不致辦理掣肘但令積水早得疏消田地早得耕穫畿輔數百萬生靈感戴皇仁無既矣

擇要疏河以紓急患疏

程含章

竊維禹貢之言治水其大要在導之一言孟子以疏濬決排釋之凡以順其就下之性而行所無事也是以欲治上游先治下游必尾閭暢而後腸胃之氣勢乃順欲治旁脉先治中流必胸腹利而後四肢之血脈乃通臣等前因秋汎後積水未消已奏明先築千里長隄聲明應疏各河俟明春水落辦理在案今千里長隄已築成十分之七止餘水深之處天寒冰凍人夫難以立足請俟明春接築完竣惟疏河雖在明春必須早爲估勘派定工員俾得預行講求庶明春不致辦理倉猝查天津爲衆水會歸之處全省之尾閭也現止有海河一道消水入海每至盛漲消洩不及輒汪洋一片淹沒數百里爲害甚鉅應請多其途以洩之使衆水分道入海分洩之法其要有三一爲塌河淀上承六減河之水下達七里海舊有簪口寧車沽二引河今查寧車沽一河久已壅塞該處逼近海口濁潮易淤挑濬無益惟簪口河流入薊運河雖

海口百數十里不慮潮泥湧入應自天津西沽之賈家口挑起展寬足十六丈以洩北運大清永定子牙四河之水使入塌河淀再挑西隄頭引河並添建草埧以洩塌河淀之水使入七里海再挑邢家坨一帶展寬二十丈以洩七里海之水使入蘆運河以達北塘入海惟自營口以下潮汐往來若就舊河展寬潮水一日再至淹深四五尺人力難施應于北岸陸地另開一河寬十四丈使與營口河並行而下則工費較省共估計銀十三萬二千八百五十餘兩一爲北運河受潮白溫榆之水來源本大加以大清子牙永定諸河之水其勢更形浩瀚舊有減河六道現查王家務石埧年久壞濫急應折造共估計料銀九萬九千四百七十餘兩其下減河本年夏間因限于錢糧畧加挑濬僅至八道估而止不足以資宣洩應再加挑挖直達塌河淀共估計銀一萬五千五百八十兩其下爲筐兒港口門寬六十丈消水甚暢爲引河下游高又無隄埝工程浩大礙難辦理臣等另摺議奏再下則爲南倉霍家嘴辛莊及堤現在展寬之賈家口四河儘足以減洩盛漲一爲南運河上承漳衛洹汶之水渾濁而悍每遇大雨動輒拍岸盈隄舊有減河四道在山東者爲四女南哨馬營二河下游流入直隸仍歸山東之海豐縣入海臣等接准山東撫臣來咨四女南減河業

經修浚哨馬營減河亦已勘估應將直隸下游先行挑挖等因臣等當委熟諳工員往勘吳橋縣境之鈎盤河爲哨馬營支河下游現已淤淺又四女南哨馬營三河至吳橋縣會流入老黃河歷寧津南皮鹽山三縣與東省之樂陵縣交錯河身狹窄不足以容納兩河之水均應挑挖自慶雲以下河道深通勿庸估計等語並據造送估冊前來臣等伏查吳橋等縣之鈎盤河老黃河與山東之德州樂陵縣上下相承犬牙相錯必須兩省同時並辦一氣呵成庶不致旋挑旋淤現在天寒冰凍不能辦理明春東省糧船過境亦未便拆卸石埧致礙緯路臣等現擬俟興辦時委大員前往覆估咨會山東撫臣于明秋同時辦理在直隸境內者爲捷地興濟二減河捷地河本年春夏間雖已估挑因限於錢糧丈尺不足應再加展寬連修石埧雁翅共估計銀三萬三千三百五十四兩零再下則爲興濟河久已淤平北岸埧口雁翅壞爛急應挑修共估計銀六萬四千七百七十七兩零又沿河隄身除今年擇要估修外尙有卑薄應間段加培現飭天津道逐一估計另行核辦凡此習疏濬之事多其途以洩之使全省之水不致畢注于天津而尾閭始暢也尾閭之水旣暢則胸腹之氣乃通至東淀西淀全省之胸腹也東淀之扼要在三河頭楊家河與南北中三股河合

查三河頭楊家河本年入秋以來業已衝刷深通毋須挑挖惟三股河及范家口一帶間段淤淺應加挑濬並添建草埧共估計銀一萬七百兩零西淀以清河口馬道河趙北口爲扼要今馬道河甚爲淤淺趙北口連橋上下被居民堆砌園土河窄如溝淀水爲之不流挑河截淤共估計銀一萬六千二百七兩零又十二連橋橫亘淀中乃南北往來大路檢查各橋木石均已坍塌朽壞道路被水沖刷行旅艱難亟應興修修橋築道共估計銀二萬二千七百七十二兩又清河口乃西淀出水門戶被白溝河橫衝而出每遇大雨即挾沙帶泥不但獨占清河口且倒灌而西致淀水全無去路臣等前經查照舊案議奏請開白溝河故道使清渾各行一路業蒙允准在案今臣程含章督同永定河道張泰運清河道陶際覆加查勘河水之勢甚大前議開河寬二十丈盛漲時不足容納若兩岸築隄則工程浩大後難爲守倘若不築隄則四散漫溢河身必淤不特雄縣保定霸州三處地被淹即營田五十餘頃亦被衝刷且下游稍洩不及實多窒礙從前乾隆年間屢奏未辦皆緣于此惟白溝之盛漲不減則新城雄縣之民將被其害而清河仍無出路應請自新城十九堡村修復盧僧河以分白溝上游之勢明春趕辦不及亦應俟秋間興工時估辦再由雄縣之大

灣開復密河以分白溝下游之勢估計銀二萬五千八百六十兩如此雖不能使清濁分流而白溝河經此兩河減洩之後則水之至清河口者已去其半清河之水可以相敵直出玉帶河矣再開復十望中亭河以洩玉帶河之水直達台山估計銀五千六百六十兩凡此數端皆決挑之事使胸腹寬舒不至脹滿爲患也尾閘之勢既暢胸腹之氣漸舒則得其就下之性而支派旁流乃可次第導引不致動輒爲患矣以上各工盧僧河及鉤盤老黃河緩至明秋辦理南運河間段培隄尙須確估外其餘總共銀四十七萬三千餘兩再各工皆濱臨河淀舉鋤見水必須水中撈土且有運遠之處此次所估土方應請統照通永道成規分別辦理免致工員藉口賠累致有草率

申嚴例禁以彰國法而除民害摺

朱崢

奏爲申嚴例禁以彰國法而除民害直抒管仰祈聖鑒事竊惟害必有除法不容廢我國家承平垂二百年所以爲民除害泄中國而撫四夷者具有成規如鴉片煙一項流毒甚熾乾隆年間來者尙稀不知其害未行禁止嘉慶初年立禁已有專條疊經議奏節次增修法制綦嚴無如有司查拿不力以至民心胥漸日長月滋蔓延殆

遍天下辦之不早辦誅之不勝誅當事者幾若束手而無可如何然夷船載運鴉片必不能零星售賣廣東省城有包買戶謂之密口由銀號兌價於夷館給票單至疊船取土此顯而易查者也至往來護艇曰快蟹曰扒龍砲械備具運漿如飛豈得任其橫行海面置之不問前任兩廣督臣盧坤曾調派水師副將秦昌裕香山知縣田溥等拏獲梁顯業販賣鴉片船隻起出鴉片壹萬肆千餘斤並按治密口匪犯姚九歐寬等是知封疆大吏誠督率文武員弁實力搜查認真擒捕取其太多者處之極刑原有辦法所患者忽操忽縱執法不堅耳果能到底不懈有犯必懲民即爲利豈真不畏法乎或疑法者胥役棍徒之所藉以爲利不知國家立一法必生一弊法即有時而窮斷無因噎廢食之理即如娼賭奸盜諸不法事何嘗不爲胥役棍徒所利訛詐栽贓亦所不免而隨辦隨出詎得云法窮而議廢哉蓋法之禁民爲非猶坊止水之所自來也如以舊坊爲無所用而壞之則奔溢汜濫有不可勝言者矣乃外間紛紛議論皆云禁而不禁如不禁之禁臣夙夜思維誠不知有何善策或云令其納稅入關交付洋行只准以貨易貨不准以銀購買此杜銀偷漏之說也惟是英吉利販賣鴉片自道光元年經前任兩廣督臣阮元查辦屯戶之後久驅出零丁洋而不

復入澳門矣既已麾之使去又復招之使來殊屬不成事體若云兌換茶葉洋銀亦一體禁其出洋臣恐茶葉不足將復易之以銀也如能禁洋銀之出洋又豈不能禁鴉片之入關但能禁鴉片入關則洋銀自不至出洋矣均之禁也改絃而更張之何如仍舊貫之爲愈乎若夫收鴉片煙稅其言不順其名不美此其說之不可行者也或又云寬內地種罌粟之禁則夷人之利日減久之將不禁而自絕豈知俗情貴耳而賤目忽近而圖遠內城雖有必以來自外洋者爲佳如江浙閩廣之間不遵國寶而用洋銀洋銀色減議價轉昂紋銀色足議價轉少即內地有依樣鑄造者曰蘇板曰土板曰建板不能易其所尙也又如中國之綢緞布疋非不足用而外夷之大呢羽毛洋布盛行於時貴異物而賤用物人心昧沒大抵如斯今閩廣浙東雲貴雖經科道各官奏請禁栽罌粟採熬鴉片然名禁而實未禁也他省臣不敢知即如雲南一隅種罌粟者漫山遍野鴉片之出產歲亦不下數千箱然而出洋之銀不見減於昔日在滇之民乃倍窮於曩時其故何哉食之者多而擇食求精者又必以洋煙爲美也議者不察比之旱煙誤矣夫旱煙無害於人者也旱煙之利輕鴉片之利重種煙草者可於閒曠之地種罌粟者必占膏腴之壤奪膏腴之壤以種罌粟而謀重利

小民爭趨如鶩猶肯藝桑麻而種稻粱乎隘衣食之大源胎禍患之根本譬諸病者引肌膚之疾而入於腹心欲勿速死不可得已而乃以廣東三熟之田概天下肥饒不齊之地豈通論哉總之鴉片流行傷財害小殃民害大民者國之本財者民所生民貧尚可變通民弱不可救藥臺灣府志云鴉片土出咬溜巴又云交留巴本瓜哇地其初土土人輕捷善鬥紅毛製爲鴉片誘食之使舉國爭趨如鶩久遂瘦羸受制竟爲所據今英吉利亦紅毛番種也恃其富強妄肆披猖初以鴉片入關即有削弱中原之意覺之不早漸成橫決年來該夷桀驁不馴之狀歷有成案其船竄入閩浙江南山東天津奉天各海口誠不知是何居心恭讀聖祖仁皇帝康熙五十五年十月聖訓云海外如西洋等國千百年後中國恐受其累仰見聖祖深思遠慮外夷情事久在神明洞鑒之中今方百二十年中國之受累已見其端矣縱未能遽然絕其互市亦當思患豫防嚴備各省海口稍加懲創使彼知所儆懼嘉慶二十三年仁宗睿皇帝以撫馭外夷之制示兩廣督臣曰國家撫馭外夷具有一定規制遵守者懷之以德干犯者示之以威英吉利粵貿易其貨船及護貨兵船停泊處所久有定例若該夷人不遵定制有違禁令先當剴切曉諭宣示威德以杜其覬覦之心倘竟敢

恃其强悍擅越界址則不能不開礮轟擊使之懾我兵威總之懷遠之道當先以理勝斷不可孟浪從事先啓兵端亦不可過示怯弱使彼無所畏懼也煌煌乎廟謨洵萬世法矣皇上御極以來敬念家法騎射爲本屢飾各省督撫提鎮整飭戒行練習水師務俾士卒悉成勁旅仰見聖主習勤肄武重國本而威四夷之至意然鴉片之來源不絕即難保營伍之中無私相吸食者一經沾染寢以成風煙癮來時手足顫軟涕泗交流又安能勤訓練而成勁旅乎如此兵丁進不能戰退不能守十二年廣東奏猷匪之案言連州軍營戰兵多有吸食鴉片煙者兵雖多難於得力其明証也或言弛禁僅聽民間販賣吸食若官員士子兵丁仍不在此數是則曲爲之說所謂掩耳而盜鈴者也以天下人數計之官弁士子兵丁不過十分之一而民居其九今之食鴉片者大率起於官員之幕友家丁廷及於市廛游民而弁兵士子亦漸染其習所不食者鄉里之愚民居多耳若猶獨禁員弁士兵而許民間販賣吸食是得食者多而不得食者少也是已食者縱得食而未食者導之使食也禁之勿食猶懼或食導之使食有不食乎至民多吸食則員弁士兵又何可得而禁何則員弁士兵非生而爲員爲士爲弁爲兵也其初大抵平民也即如兵丁缺額必募平民充補而應

幕者率多無賴之民爲平民之日則食之及爲兵丁煙已成癮不可斷絕又從而繩之以法此孟子所謂罔民者也至員弁士子在家安坐而食之孰從察禁苟或不檢則胥役僕隸皆得挾其短長而擅其廢置妨訛詐而訛詐之端啓慮栽贓而栽贓之釁深賤妨貴少凌長下犯上豈非亂天下哉幸不至是則陰相煽誘互爲容隱事有必然無足怪者故聽民間販賣吸食而欲禁官弁士兵不可得也今天下人心之陷溺深矣愚者惑於邪教而執迷不悟黠者耽於鴉片煙而淪胥莫返臣嘗思所以覺悟之方而不可得然恃有國家之法在則良懦之夫終有所畏而不敢即游惰之輩尙恐人知而自藏雖屬其文而隱爲妨範者正不少也若一旦弛禁朝廷不以爲非愚賤安知其失明目張膽公然販賣吸食久之視爲固然竟若飲食日用之不可離而恬不爲怪矣廉恥喪盡忌憚毫無其有關於世道人心者良非淺鮮臣知國法具在諒不致輕議紛更但外間既有此議論一時奸商匪類莫不仰首伸眉安希風指以爲此禁一開而今而后可以肆行無忌也已臣以非材蒙恩拔擢不數年間由科道洊歷京卿晉階學士隆施優渥未報涓埃苟有所知不敢不言應請旨飭下各直督撫令地方官重申禁令嚴切曉諭舊染汚俗咸與維新如仍蹈故轍不知悛改當

按律懲治決不寬貸其有屯販鴉片至于觔以上實之重典庶人心肅然而海外聞風向化矣臣愚昧之見是否有當伏祈皇上聖鑒訓示謹奏

慎重名器疏

朱嶠

奏爲敬陳管見仰祈聖鑒事竊惟賞賜者勸善之經科目者求賢之道我國家設科取士三年大比錄其文藝優長者貢於春官名曰舉人甚盛典也上年畿輔荒旱收成歉薄百姓嗷嗷待哺仰荷皇仁浩蕩賑糶頻施小民已無虞失所嗣以日久用繁各官倡議勸捐本年據潘仕誠報捐銀一萬二千兩蒙恩賞舉人准其一體會試此乃皇上逾格之鴻施亦一時從權之至意原未嘗著爲定例也且潘仕誠本係副榜貢士去舉人一閒耳賞給舉人是於破格之中仍寓量才之意斟酌而行豈漫然哉厥後葉元埜黃立誠等陸續報捐經巡城給事中順天府尹奏請議叙勅下大學士軍機大臣會議遂乃比照銀數請賞舉人雖曰以昭畫一然於聖主慎重名器之心因才權衡之道尤未能深體而詳究也若因此遂成定例臣竊謂適足生富豪僥倖之心而阻寒儒進修之志向來捐例京官自郎中以下外官至道府以下皆准報捐至清要衙門非舉人出身者不得與焉官可捐而出身不可捐也今以輸銀助賑之